

欽定剿平三省邪匪方略

欽定剿平三省邪匪方略正編卷三百三十六

壬戌年

九月初一日。方維甸奏言伏思楚省爲教匪

起事之處滋擾多年賊匪路徑本熟而宜昌鄖

陽兩府所屬地方尤爲林深山險一兩路兵力

往往不能兼顧茲幸各省賊匪屢次痛剿著名

首逆全就殲擒所餘殘匪不及從前千百分之

一可以騰出勁兵赴楚會剿至北面近江地方

甚屬寧謐居民安堵

臣

因賊蹤無定仍隨時差

兵偵探查提船隻何處賊蹤較近卽行酌量移

防若賊匪被大兵擊散後奔竄零星更恐假冒

商民乘間潛遁

臣

惟有督飭各營卡認真會哨

巡邏盤詰毋使一名偷越斷不敢稍存疎懈再

查大功告蒞時裁撤鄉勇最爲要務似須在議

撤官兵之前若陝省南山餘匪殄盡豫省西路

防兵可以酌移則以兵易勇先將江岸鄉勇全
裁口糧亦大可節省臣現與南汝光道林樹芳
密稟撫臣馬慧裕商定

奏明辦理奏入

上命軍機大臣傳諭馬慧裕方維甸曰蒲逆一股早
經德楞泰奏到已將首夥全數剿淨楚境不過零
星竄匪德楞泰等現在分投搜捕賊匪斷不敢竄

近江岸卽德楞泰亦斷不肯令其散竄尅日自當
辦淨至方維甸奏稱裁撤鄉勇似須在議撤官兵
之前一節所見甚是與朕節次所降諭旨相同惟
所稱將豫省西路防兵酌移江岸先將該處全裁
等語豫省防江鄉勇爲數較多此時若驟將西路
官兵移駐江岸恐鄉勇等不免以跡近防閑心生
疑慮辦理尙未周妥莫若聲稱陝境現在餘匪漸

就肅清無須豫省多兵在西路防堵楚省蒲逆雖
已辦淨尙有餘匪恐其竄入豫境現在原防西路
之兵撤出若干移防江岸俾鄉勇聞知自必安之
若素俟此項官兵到後將防江鄉勇畧加資遣各
令還鄉伊等自必安靜散歸可無他慮至田永稠
常林二員內應令何人帶兵若干移駐江岸之處
著馬慧裕酌量情形一面飭知遵照一面奏聞方

維甸係屬藩司通省應辦之事甚多此時楚省賊蹤距江岸甚遠該處既有總兵駐劄又有林樹芳等在彼足資辦理方維甸俟該鎮帶兵到彼後卽可回省任事

同日

上諭內閣曰戶部奏請飭查軍需米數以備核銷一摺此次川楚陝甘四省剿捕教匪案內節次動撥

軍米款目紛繁若不逐案查明易滋牽混自應照
戶部所奏飭令該督撫分晰造冊先行報部立案
仍於奏銷案內分案列款以資核對但軍興日久
各省動用米石除本省碾動及就近採買之外有
本省缺米赴隣省採買者亦有外省協解他省經
由該省截留者款目過繁清查不易若照部議限
以兩個月報部爲期稍迫著加給兩個月限令該

督撫詳悉查明分欵報部無得再有延玩倘逾四個月之限不行報部或有牽扯淆混等弊著該部據實叅辦

初二日

庚午

陸有仁奏言連日據探報賊匪靳士

黃一股由盤屋屬之松花坪一帶奔竄札克塔爾等帶兵搜剿又分出另股之賊竄至天華山屯劄經副將張瑗乘夜帶兵掩襲殲獲偽總兵

胡登朝等三十餘名餘匪入林逃遁又零匪苟
七麻子一股竄至盤屋王家河楊遇春親督兵
勇緊躡搜捕又張逆零匪竄至虎豹河老林格
布舍等帶兵搜剿又零匪十餘人竄至洋縣花
椒園經知府趙洵督飭委員阿齡阿易萬里率
勇搜剿殲斃賊目賴龍等數人現在經畧額勒
登保移師寧陝廳屬之兩河居中督辦督臣惠

齡駐劄峪口分派兵勇入山協同搜剿並隨路肅清運道又據西鄉縣稟報川省零匪一股竄至縣屬滾龍坡經原任總兵楊奎猷等帶兵堵截賊匪卽折回川境太平屬之皮貨舖又據平利縣稟報楚省殘匪數百人竄入縣屬馮家營一帶穆克登布喜明等星馳截擊各處寨勇亦俱合力往剿自斷不致深入所有各路糧餉

臣

督飭源源運供並無缺誤至裁撤鄉勇一事現在各營卡已裁撤一千六百餘名嗣後逐口俱有遣送該勇等因每日既有口食可領晚間又有棚廠可宿凡渡河登岸均經地方官妥爲照料同籍後更有賞賚銀兩莫不歡欣鼓舞竟以同籍爲榮是以沿途行走極爲整齊安靜道員朱勲副將王兆夢等現經馳赴寧羌邊卡由西

而東次第裁撤客俟續報數目卽當隨時具奏
奏入

上命軍機大臣傳諭陸有仁曰據探明各路剿辦餘
匪情形覽奏俱悉此時陝境零匪無多兵勇漸次
減少軍需較爲易辦前經續撥銀一百萬兩餉項
極爲寬裕陸有仁當嚴飭局員等撙節辦理無悞
供支不可因帑項充餘稍滋糜費爲要

初三日

辛未

額勒登保奏言據探報張芳苟朝九

股匪由傅家河逃遁有由磨溝竄向漆木坪之

勢侍衛金保遊擊祝廷彪劉琥等由牛欄溝蒿

溝進剿總兵李應貴帶兵於傅家河扼住南面

楊遇春帶兵於高關一帶扼住東南

臣

派令遊

擊王兆龍帶領兵勇於花石崖韭菜坪設伏以

待並飭令各鎮將等務須奮力趕辦將苟張二

逆卽行剿除茲據侍衛金保遊擊祝廷彪劉琥
等報稱十九日帶兵由光頭山花梨灣一帶躡
蹤追剿探得逃匪因官兵追剿緊急又分兩股
奔逃金保祝廷彪劉琥等於二十日追至東涼
水廟坪一帶據逃出被擄民人報稱賊匪三十
餘人在南溝擄糧現到鼈窩子屯聚遂卽挑帶
精勁兵勇四百餘名乘夜於林內覓路潛進五

更時行至南溝金保祝廷彪劉琥等復將兵勇
分爲兩路一路由南溝進剿一路由鼈窩子山
壓下該匪正欲起竄見有兵來均各持矛抵拒
官弁兵勇奮身圍剿將賊匪三十餘人全數斬
獲淨盡生擒苟文齊探馬頭楊大貴等十二名
殲斃張芳及僞總兵吳廷召張鄉約等二十餘
人奪獲長矛三十餘桿楊遇春將所獲賊犯押

解至

臣

軍營並將張芳首級及餘賊耳記一併

送驗

臣

訊據苟文齊供稱我係苟文明胞弟向

在營中充當大頭目與苟朝九張芳在一路前

在小白岩被官兵追殺在半山密林內躲藏見

有戴紅頂一人追殺過來我從林內突出用矛

猛力將他戳死連日因官兵追趕更緊苟朝九

帶領數十人四散逃走我同先鋒張芳們帶領

矛手三十多人逃到鼈窩子不料官兵趕來圍
住把張芳殺死我被官兵拏獲等語並查驗賊
目張芳首級亦屬確鑿臣查該犯等充當賊目
肆惡有年昨復戕害大員實屬罪大惡極訊明
後卽飭將苟文齊及同時拏獲之探馬頭楊大
貴凌遲處死餘俱正法以服人心而洩衆憤並
將出力兵勇優予賞賚以示獎勵其餘斬土黃

張士雲等皆係七八十人三二十人以及十餘人於林內零星逃匿現有楊芳及各將領等率領兵勇節次擒斬三五名不等臣已分別飭催

上緊搜剿不致延緩臣昨奉

諭旨令卽帶同扎克塔爾統領大兵取道平利並令穆克登布帶兵一同赴楚會同德楞泰剿辦楚省餘匪南山搜捕事宜酌留弁兵交楊遇春楊芳辦

理等因欽此

臣

查刻下南山餘孽無幾楚省賊匪

較多自應移師入楚剿辦

臣

現據穆克登布報

稱蒲添實股匪經德楞泰疊次截剿後該匪竄

至竹谿分出四五百人竄入陝境之南江河穆

克登布喜明先後帶兵趕到迎截德楞泰所派

副將鄭啟貴等亦緊追前來將該匪逼入河內

淹斃數十人餘匪由黃龍溝竄上大山鄭啟貴

等仍帶兵追剿蒲逆正股賊匪喜明率同守備
柯連仲等由黃龍溝追剿分竄之賊旋即於東
西河口等處殺賊數十名獲賊二十七名訊係
冉添富爲首共有賊匪四百餘名除殺斃淹死
外現有二百多人遁匿深林穆克登布喜明現
在督率各勇分路搜捕又接德楞泰來信蒲添
寶之父蒲子發現已被官兵殲斃蒲逆人數無

多卽可辦竣惟興山歸州巴東境內有熊姓賊
匪七八百人鐵姓賊匪五六百人戴四崔胡及
王國賢餘匪均有二三百人此外二竹一帶尙
有一二百人爲一股數十人亦爲一股約計楚
境賊匪尙有三千餘人亦亟盼臣前往協剿臣

現卽率同扎克塔爾及侍衛將領馬步兵勇三
千餘名並調令格布舍迅卽前來由石泉安康

平利一帶進發與穆克登布入楚刻下南山內
靳張等逆並零星賊匪合計不過三四百名所
有搜捕事宜已酌留官弁兵勇交楊遇春辦理
其格布舒前此接管慶成一路官兵亦交楊遇
春統領合之總兵楊芳所帶寧陝官兵以及總
兵李應貴所帶四川官兵俱足敷用該提督自
能趕緊剿捕肅清南山現據孝義廳同知徐洪

懿稟報該屬西溝峽有賊匪藏匿經軍功謝段
治張隆等招出張崇德等十五人訊係川楚積
年賊匪既係真心投誠自應貸其一死已飭令
將有家可歸者遞解回籍交地方官管束其不
願同籍者卽妥爲安置是賊情益形渙散惠齡
現在峪外仍督飭地方官及辦寨委員剿撫兼
施更可以期速效至西面寧汧一帶係川陝甘

接壤之區關係緊要前係慶成在彼督率防剿刻下少一大員似不足以壯聲勢將軍興奎昨

已到省

臣

擬令卽前赴寧河一帶率同總兵慶

溥國興阿及永明等防剿以昭慎密現已將南

山剿捕機宜並陝境撤勇歸兵整頓新設營伍

及漢南分防各要務詳晰告知楊遇春

臣

因日

內大雨連綿河水處處漲發俟一二日雨止水

消卽速帶兵東發再裁撤安置鄉勇事宜

臣飭

令陝安道朱勲副將王兆夢前赴漢南清查辦

理並以漢南一帶各鎮將所帶防剿鄉勇多係

本境民人先期通飭各鎮將查明如係附近營

卡民人有家有業以及衰弱不甚得力者先行

酌量裁撤其餘川楚等省民人及籍隸陝省而

隔府別縣者皆聽

臣

委員清理茲據穆克登布

慶成總兵九十富蘭劉瑞汪啟喜明副將劉管
城都司德忠永明守備柯藩等先後報到共裁
撤鄉勇二千四百餘名皆係附近居住愿卽回
家之人將應得鹽糧找算清楚遣令散回知會
地方官安置至_臣及楊遇春等所帶進剿鄉勇
除係南山附近民人_臣已飭令詢明素有家產
情願歸業者給予獎賞陸續遣去一千三百餘

名外尙有不願在營距籍較遠者二百餘名

飭令道員朱勲副將王兆夢帶赴漢中按起分
遣茲據稟報查得各勇內有願在漢中食糧者
八名舊縣關食糧者十六名均交漢中協並舊
縣關營補給名糧有籍隸城固洋縣西鄉者共
五十三名該道協派令千總謝榮護送至各該
縣安置又籍隸楚省者三十三名派令守備崔

雲帶領由興安水路送回鄖陽交替又有籍隸
四川者一百餘名道員朱勲卽乘茲赴寧汚清
查卡勇之便親身照料起程送往川界川北道
李鎡保寧府言朝標已先期到彼料理派員接
送所有該勇等應得賞銀悉經該道等當堂包
封交護送之員携至原籍會同該地方官按名
散給至各該勇所執器械均飭令量給價值收

買各勇等均各頂戴

皇仁歡欣就道沿途並無落後滋事之人極爲安靜

朱勲王兆夢現已由寧沔一帶各營卡次第查

辦惟

臣

現在飭令各鎮將清查官兵各歸各隊

漢南各營卡一帶防兵業經更動調換稍涉空

虛所有各卡防堵鄉勇尙難驟行全撤

臣

現擬

於緊要處所各暫留二五百名藉昭聲勢已飭

令朱勲等一律清查登記分別去留俟官兵歸集成隊後概行裁撤至各路帶領進剿之勇

臣

除現帶千餘名赴楚協剿外楊遇春楊芳李應貴等尙帶有四千餘名現須分路搜剿亦將各勇等孰願入伍孰願回籍先行造冊登註一俟南山將次肅清卽可按籍安置總期大兵未撤以前全行裁撤使入伍者各事操防回籍者咸

安生業現在道員朱勲等所辦已有頭緒是此事尙不致棘手可以上慰

聖懷

同日德楞泰奏言竊

臣

前將蒲添寶等大股首

夥賊匪掃除商令長齡先赴東湖歸州督剿零

匪並

臣

督率德昌等分兵往二竹一帶搜捕緣

二竹一帶均係老山箐林凡各股剿散零匪往

往一見大隊官兵卽四散遁藏不能得手必須
另爲設法搜捕或改裝易服或乘夜襲擊方能
濟事當令副將馬元守備高星文周志林曾大
用等帶兵勇五百名由王家山高平河一路前
進令副將馬應國都司龍必達守備李輝林陳
偉等帶兵勇五百名由邊江河大西河一路前
進令叅將沈洪守備黃廷相千總謝金章等帶

兵勇五百名由魚溪河一路前進令副都統銜
富僧德副將何君佐叅將張應貴遊擊涂陞沈
彪等帶馬步兵勇八百名由白芨埡一路前進
均不裹帶鍋帳並不執打本營旗號改裝前往
設法搜捕臣同賽冲阿溫春色爾滾馬瑜蒲尙
佐由葛籐口司馬崗一路取道房縣之灣腰樹
自北向西以爲各路策應十九日據馬應國等

稟稱探得古墳嶺一帶有零匪二三十人在彼
滋擾當卽帶兵勇前往搜捕該匪鑽入老林適
總兵德昌追剿賊匪六七十人亦遁入散水河
老林內兩路官兵會合於是夜二更時赴林內
行走二十餘里約已四更見有板房二處賊俱
睡熟羅倫府光裕卽率兵勇前往圍住立斃賊
三十六名生擒二十三名割獲耳記三十六副

受傷兵勇數名訊係黃藍白三號餘匪並無頭
目馬應國令龍必達等帶領兵勇亦於是夜趁
月色在古墳嶺老林內搜捕截斃賊匪十六名
生擒劉大成等七名訊係白號餘匪只有二十
多人所有兩路獲犯均係積年戰手一概正法
二十一日又據叅將沈洪等稟稱探有餘匪四
五十人在瓦桑河等處當帶兵勇假充賊匪前

進該匪見其情形可疑正游移間我兵卽向前
擒捕立殺賊二十一名生擒五名訊係黃號唐
明萬餘匪俱係積年老賊當卽正法二十三日
據富僧德何君佐等稟報探得小溝鶯巖一帶
有零匪三十餘人當卽帶兵勇趕追至碓窩溝
深河寨殲斃賊匪二十九名訊係藍號蒲添寶
餘匪_臣均隨時飭知該鎮將等令各竭力搜捕

不可稍存草率了事之見並令其直搜至川界
仍回轡腰樹會合歸併兵力向巴東興山自北
而南進剿

臣

現在軍次官渡看來二竹一帶不

日即可肅清長齡於十三日分兵南行由房縣
向五台一帶前進探有大小賊匪兩股約共九
百餘人小股由珠藏洞東竄大股向保康之蔣
口黃栢坪而逃長齡現已趕赴黃栢坪與孫清

元分兵相機抄截等情計長齡一路緊跟賊蹤

日內自己接仗至二竹此時將次肅清

臣

現擬

留德昌帶兵仍在二竹一帶往來搜捕

臣

督兵

向巴東興山進剿將崔胡戴熊各逆趕辦期與

長齡等兩面夾攻一俟額勒登保來楚彼此會

合將楚境各零匪一律就地掃除斷不令其竄

陝亦不使之入川以冀三省全就廓清迅速肅

功仰慰

聖屢再此次追剿蒲逆股匪總在老山箐林之中風
雨寒冷兵勇多係單衣跣足川省所製軍裝衣
履尙未到營正在籌慮茲候補知州竹山縣知
縣范繼昌押運軍米來營見川省兵勇在楚剿
賊勞苦製辦棉襖一千件布鞋一千雙草鞋一
千雙稟懇分賞兵勇

臣當於

賞項內撥發價值又據范繼昌稟稱自願捐備情詞
真切洵屬急公當令散給各兵勇甚爲得濟再

臣
前奉七月初五日

上諭令將蒲逆首夥悉數擒拿一俟此股辦完卽將
色爾滾蒲尙佐二人及此外出力將弁據實保奏
茲遵將色爾滾與達勒特阿等兩路實在出力
之將領員弁兵勇內擇其超衆者公同詳慎遴

選分別應陞應賞敬繕滿漢清單恭呈

御覽再查有湖北鄖陽府知府阿霖此次籌辦隨營糧餉事務相應請

旨交部議叙又四川龍安府知府積朗阿於審訊獲犯委查洞寨均能詳慎帖服相應懇請

賞戴花翎又候補同知直隸州之湖北松滋縣知縣沈堂委辦隨營糧務經理妥協現在尙未得缺

相應請

旨遇有同知直隸州缺出儘先陞補又候補縣丞邱
允泰宜昌府司獄馬國瑛或幫辦糧務或催趲
軍火皆能涉歷險艱均爲勤勉邱允泰尙未得
缺請遇有縣丞缺出儘先補用馬國瑛請以府
經歷縣丞儘先陞用如蒙

聖恩俞允該員等感激奮勉倍加出力實於軍行有

禪均奏入

上命軍機大臣傳諭額勒登保曰陝省南山餘孽無
幾有惠齡楊遇春等在彼足資搜捕額勒登保自
應移師赴楚協剿至楚省蒲逆一股業據德楞泰
奏到全數殲除想額勒登保發摺時尚未得知此
信此時楚省如熊翠熊方青戴四崔胡等股共計
不過一二千人前此勒保摺內有楚省竄匪闖入

大寧邊界約有千餘人之語或卽係此等股內餘
匪亦未可定楚省本有官兵爲數已屬不少今額
勒登保率同札克塔爾等復帶領兵勇三千餘名
前往軍威更爲壯盛諒楚省敗殘餘匪經兩路勝
兵協力截剿自不難尅日辦淨本日又據德楞泰
奏分兵六路搜捕零匪多有斬獲二竹一帶將次
肅清德楞泰督兵先向巴東興山進剿將崔胡熊

戴各逆趕辦一俟額勒登保來楚妥爲會商等語
是德楞泰亦望額勒登保帶兵到彼協同剿辦現
在額勒登保由平利紫陽移師赴楚自應由二竹
行走所有該處未淨餘匪正可順道搜剿如已全
數剿淨當趕緊行走迅速到楚伊與德楞泰素本
和衷當悉心商酌視何處賊匪緊要卽向何處上
緊剿辦或分或合朕亦不爲遙制務於九月內一

律辦竣肅清楚境彼時如川陝零匪均已搜捕無遺額勒登保卽可就近與德楞泰及勒保吳熊光等會商聯銜用紅裏黃面之摺奏報大功全竣宣示中外同膺懋賞當計日以待捷音之速至不可稍延時日朕昕夕盼望願汝等速成大功以慰七年積慕再另片奏裁撤安置鄉勇事宜所辦俱妥其所稱總期大兵未撤以前全行裁撤二語最爲

得要前經朕節次降旨指示川陝楚三省皆應如此辦理庶鄉勇等回籍者咸安生業入伍者各事一搽防自可相安無事也

上命軍機大臣傳諭德楞泰曰德楞泰因楚省零匪一見大隊官兵卽四散遁藏隨飭將弁等改裝潛往令賊匪不覺分投密捕俱有斬獲現在二竹一帶將次肅清德楞泰留德昌帶兵在彼往來搜捕

伊先向巴東興山剿辦崔胡戴熊各逆所辦甚是
但前據勒保奏有楚匪千餘人竄入大寧邊界何
以此次德楞泰摺內未經提及此股賊匪究竟係
何股分出現在會否折回其崔胡戴熊各逆賊數
究有若干著一併查明據實具奏將來奏報歲功
後不得再稱尙有零匪未淨藉詞延宕本日據額
勒登保奏率同札克塔爾格布舍等帶領兵勇三

千餘名赴楚自應從二竹經過已降旨令其將該處未淨餘匪順道搜捕德楞泰現往巴東進剿亦不必等候額勒登保到彼致有耽延總當上緊將崔胡戴熊各逆奮力截擊悉數殲擒一俟額勒登保到楚再將未淨餘匪協力掃除總須在楚境辦淨勿令其竄往川陝邊界復煩兵力務於九月內三省一體廓清蕘功完善用紅裏黃面之摺聯銜

具奏宣示中外同膺懋賞不可延致冬令又以氣
候寒冷雨雪載塗爲詞則前功盡棄矣再八月二
十九日德爾吉行圍德楞泰之子蘇冲阿射廳跪
獻當卽賞給黃馬褂蘇冲阿甫經挑在乾清門不
過循分當差因念德楞泰在軍營帶兵勤勞懋著
是以加恩伊子德楞泰當倍加感奮朕昕夕盼望
願汝速成大功永受厚恩以慰七年憂慮勉之

同日

上諭內閣曰德楞泰奏遵旨查明前在鮑家山攻破
蒲逆賊巢之出力各將弁懇請加恩均照所請貴
州朗洞營叅將沈洪著加恩賞副將銜雲南曲靖
協右營守備高星文著加恩賞換花翎山東河溝
營都司楊正雄著加恩賞戴花翎四川寧越營千
總趙浩酉陽營把總李經頂軍標右營外委戴榮

陞成都城守左營外委靳連陞順慶營外委陳萬
鑑貴州上江協左營額外外委盧元都勻協步兵
殷體正四川重慶鎮標中營步兵朱志右營步兵
張必得阜和協右營馬兵何大成馬邊營步兵羅
廷棟成都城守營新兵楊章明貴州思南府鄉勇
田朝明湖南永順府鄉勇單貴四川東鄉縣鄉勇
鄭大虎均著加恩賞戴藍翎以示獎勵

上又諭內閣曰德楞泰奏查明隨營文員或委查伺
寨審辦案件或經理軍需催趙糧餉皆能不辭勞
瘁奮勉出力懇請分別加恩均照所請知府阿霖
著交部議叙積朗阿著賞戴花翎知縣沈堂遇有
同知直隸州缺出儘先陞補候補縣丞邱允泰遇
右缺出儘先補用司獄馬國瑛著以府經縣丞儘
先陞補用示獎勵

同日惠齡奏言竊思經畧額勒登保接奉

諭旨後自必料理起程前赴楚省誠恐各路官兵及
地方文武以刻下賊數無多經畧業已遠去遂
致心存觀望或有遲緩且恐副將應元寬陣亡
之後賊勢未免鴟張必須將苟七麻子賊夥迅
就殲除以壯軍心而寒賊膽當卽一面飛札提
督楊遇春俟經畧起行後將所留官兵酌量派

撥深入老林分投搜剿適將軍與奎已由西安
趕赴經畧大營將剿捕機宜面爲商酌會同楊
遇春協同辦理

臣

復飛檄嚴催總兵楊芳及各

路將備並山內山外各廳縣印委等員率領兵
勇寨民協力搜拿以期淨盡茲據各路稟報苟
七麻子一股零匪百餘人由董家溝向東逃竄
經副將吳廷剛商令遊擊祝廷彪由廟坪抄剿

叅將張超遊擊劉元明帶兵接續前進吳廷剛
亦由董家溝跟蹤追擊均於三更發兵二十
一
日黎明祝廷彪帶領兵勇趕至東流水地方正
遇該匪在空屋內屯聚適張超劉元明先後趕
到隨即四面合圍奮力撲殺當將少掌櫃苟七
麻子偽總兵吳廷詔探馬頭楊大貴等十七名
生擒並殲斃偽先鋒張芳等二十名訊據苟七

麻子供稱此股零匪卽係該逆與苟朝九帶領
苟朝九帶著婦人幼孩並矛手共有四五十人
先往鼈窩子腦上林內藏躲該逆僅帶戰手三
十餘人在後擄糧致被擒殺淨盡等語吳廷剛
已將所獲首夥各犯解至楊遇春軍營審辦查
苟七麻子一逆卽係戕害副將應元寬之巨惡

臣當經飛札楊遇春於訊明後如尙未正法卽

將該逆解送臣營委員押赴盤屋縣在於應元

寬靈前摘心致祭以洩衆忿而慰忠魂一面飛

催吳廷剛等仍督率兵勇務將苟朝九等零匪

搜拏淨盡勿留餘孽又太平峪內東西溝老林

有零匪二十餘人潛匿通判維昂率同委員王

宗垣鼓勵壯勇乘夜掩殺殲斃賊匪十六名生

擒周元等五名解交鄂縣審辦適又有零匪一

股從光頭山竄來乘夜攻撲維昂營卡維昂督
勇奮力抵敵殺斃賊匪九人壯勇亦有傷亡賊
匪由東南逃遁又總兵楊芳所派千總田有年
軍功王明智等在田峪內之長城溝老林搜捕
遇見賊匪殺賊數名賊匪分股狂奔一股九十
餘人遁入東河腦田有年躡蹤緊追因黑夜失
足落水淹斃其一股二十餘人翻過乾溝遁入

桃園子地方楊芳復派守備李官富等帶兵連
夜追殺殲斃十餘人生擒陳奉等五名祇餘數
賊散竄老林又副將張瑗在黑乾塔一帶搜捕
零匪行至南溝忽遇二十餘賊登時殲斃數名
餘賊入林四竄又賊匪一百餘人連夜竄出雞
窩子經臣所派駐防石羊關之守備沙武德帶
兵迎擊該匪仍折回西溝老林潛逸再據孝義

廳同知徐洪懿稟報辦寨委員姚綸等陸續招
出零匪張崇德等十名均係苟逆等股敗殘餘
匪因見有招撫告示情愿悔罪投首求爲良民
等情查該匪等雖從賊日久今旣悔懼投誠自
應遵照

恩旨貸其一死

臣

已飭該廳訊明如有情愿回籍者

卽遞解回家不愿回籍者妥爲安插以示招徠

又節據委員地方官搜獲賊匪或一二名三四
名不等查刻下賊勢渙散臣現又嚴飭各路將

備趕緊乘勢剿除不使稍延喘息至楚省蒲添
竄股匪四五百人現在竄入陝省平利邊境提
督穆克登布已由毛坪化龍山一帶截擊總兵
喜明亦馳往爛河一帶迎剿諒可不致深入且
額勒登保現由平利赴楚更可乘勢剿除再據

陝安道朱勲稟稱該道親身護送頭起回川鄉
勇於十六日已抵川省之神宣驛面交保寧府
知府言朝標接護前進分別轉送各原籍安插
該鄉勇等沿途行走甚屬安靜洵足仰慰

聖懷再

臣

遵奉

上諭飭知甘肅布政司王文湧委員押解康逆首級
前赴武威縣會同該地方官親詣雙烈祠致祭

敬宣

恩綸以昭

皇上垂卹忠魂至意並據陣亡副將韓自昌韓加業之母韓陳氏稟稱氏感激

天恩罔知所措竊念氏夫原任千總韓增壽前以出征金川陣亡遺留四子長子自昌次子加業三子建功四子建謀惟建謀未經入營建功現任

水昌營把總年力精壯弓馬嫻熟從前隨征本省逆回曾經戰陣擬令隨征以成父兄之志

臣

察其情詞真摯出於至誠可否

俯照所請之處出自

聖裁奏入

上命軍機大臣傳諭惠齡曰此時額勒登保業經移師赴楚惠齡係陝甘總督所有該省剿捕零星事

宜均係伊分內應辦之事據額勒登保奏稱陝省
山內斬張各股零匪統計不過三百餘人自不難
迅速辦淨况額勒登保雖經赴楚而所留將弁兵
勇甚多更屬易於集事惠齡惟當轉飭楊遇壽等
督率兵弁將各處未淨餘匪上緊殲除務於九月
內辦竣勿留餘孽並嚴防川楚邊界設有零匪竄
入務須隨時搜剿淨盡現在興奎經額勒登保令

其前赴寧河一帶防堵並著惠齡移知該將軍加
意防範爲要至陝省軍務此時經畧旣已赴楚自
應由惠齡具奏著惠齡卽傳知興奎楊遇春等將
剿捕情形隨時彙報該督興奎楊遇春等無庸紛
紛各自陳奏將來搜捕完竣陝省全境肅清亦應
由惠齡專摺奏報也從前邪匪由湖北起事時惠
齡卽仰蒙

皇考厚恩畀以總統重任彼時因惠齡辦理不善以致該匪衆往來奔竄流毒六年有餘今復經朕棄瑕錄用現在剿捕邪匪一事大局俱已戡定陝省所剩不過此三數百人豈惠齡尙不能辦理完結以冀稍贖前愆乎此時惠齡如果奮勉出力陝省零匪立時剿洗淨盡辦理完善朕尙可格外加恩若涉因循延玩則不但辜負朕恩實仰負

皇考厚恩朕豈能再爲輕恕乎察之愼之至同川各鄉
勇旣屬安靜所辦尙安又據奏陣亡副將韓白昌
韓加業之母呈稱伊三子現任永昌營把總韓建
功年力精壯弓馬嫻熟懇請隨征以成父兄之志
等語韓氏一門忠烈今復請將韓建功隨征具見
急公報効之忱但念韓自昌之父韓增壽曾經出
師陣亡韓自昌兄弟又復致命行間實堪憫卹若

再令韓建功効力軍營朕心有所不忍韓建功年
富技嫻卽在本營當差儘可力圖上進且現在軍
務將竣並無効用之處韓建功卽就近侍奉伊母
勤勉當差無須再往軍營惠齡卽將此旨傳知韓
自昌之母可也所有追躡賊匪失足淹斃之千總
田有年著加恩照陣亡例賜卹

欽定剿平三省邪匪方略正編卷三百三十七

壬戌年

九月初五日

癸酉

勒保奏言竊

臣

因達勒精阿武

隆阿等帶兵追賊入楚所有楚省剿散餘匪分

股由大寧邊界奔竄入川當卽派叅將桂涵等

分投探蹤辦理茲據桂涵稟報探得雲陽屬之

江口一帶有賊匪一股約二百人在彼竄走當

卽帶兵兼程前進至附近高陽之兩峰垭該匪

正在青崗林內暫息桂涵與遊擊程元龍都司
周士貴等分帶兵勇四面圍住鎗箭齊發斃賊
四五十名生擒三十七名餘匪奪路逃竄官兵
乘勢下壓將賊匪圍在山溝內復殺斃三四十
名生擒二十三名又空手散出二三十人此股
賊匪全數辦完桂涵等將所獲賊匪解送前來
當訊出老賊鄧士信等四十二名概行正法其

餘竹谿竹山大寧等處被擄難民分別遞籍釋
放又探得前山楚省邊界竄來藍白號賊匪三
四百人已至開縣南埡場向鐵索橋扇子山一
帶奔逸

臣

當卽札飭達斯呼爾岱羅聲臬酌派

叅將蕭鳳來分兵剿辦嗣據探報該匪等竄過
磨子岩合包山等處會合另起竄匪一小股并
有腹地未淨餘匪又零星湊合一二百人竄至

仙女山適遊擊羅思舉帶兵前來該匪卽折回
姜水壩石河場一路竄走羅思舉緊蹙追趕賊
夥落後賊匪一二十名維時達斯呼爾佔羅聲
皐一路官兵正在黃土場相距不遠探聞此起
賊匪合夥竄擾之信仍與蕭鳳來合兵前往併
力夾剿該匪見有官兵四集卽向大竹捲洞門
一路亡命狂奔達斯呼爾佔羅聲蕭鳳來羅

思舉等現在分投馳往抄擊計不日可期集事
又張積一路官兵在巫山大昌龍泉寺一帶往
來哨探所有巴東境內賊匪知川省防範嚴密
連日並無竄近巫山之賊其達勒精阿武隆阿
等一路官兵前隨叅贊德楞泰過楚追剿蒲添
寶股賊茲蒲逆業已殲除德楞泰因川省官兵
較少帶兵大員無多仍令達勒精阿武隆阿帶

領原兵回川已於本月十九日回至大寧徐家壩此路官兵既回原卡大寧邊界仍可防範嚴密不慮空虛至川省本境餘匪節次搜捕所剩已屬無幾近因楚境剿散之賊分股竄來是以一時不能肅清現在竄走大竹捲洞門之賊人數稍多且該處皆係腹地恐有蔓延臣現已飭達斯呼爾岱等趕緊剿辦又大寧太平交界

新山壩一帶前此報有從楚竄來賊匪二三百人現已分起奔走有入城口之勢臣一面飛飭

防守城口之叅將閔懷希等探蹤攔截勿任深入老林一面飛飭桂涵移兵由前河一帶取道探蹤迎擊至前由西鄉竄入太平皮窩舖之賊二百餘人經太平防守官兵截擊該匪已折回陝省白菓壩一路竄去其前此竄入川北之苟

逆餘匪二百餘人經田朝貴帶兵追入鐵船山
老林連日曾否剿淨尙未得有信息此外川北
亦報有另股賊匪是此時賊勢究以川東爲重
豐紳一路官兵辦理雷波事竣經臣調令東來

現已據報起程計初四五間可以到夔此路官

兵到時川東兵勢較益

臣

臨時察看情形或令

添設邊防或令分剿各股竄匪當與妥爲商辦

至楚省餘匪此時蒲逆就殲更形窮蹙如竄至
川境卽當立時迎剿若尙在楚界亦當合力夾
擊當此功屆垂成斷不敢稍分畛域再賊匪此
時窮蹙萬分定必思一綫可生之路臣現又刊
發簡明告示諭以教匪中起事首惡均已殲除
現在僅存餘黨如有棄械逃出者無論首夥一
概免其治罪如此寓撫於剿歲事定必益加迅

速奏入

上命軍機大臣傳諭勒保曰此時川省本境餘匪已屬無幾惟楚省各賊匪經德楞泰追剿緊急該匪等畏懼兵威紛紛向西奔竄此亦勢所必然現竄至雲陽一股已經桂涵等全數辦完其竄至大寧太平交界一股人數亦少勒保已飛飭桂涵前往探縱迎擊自可迅速辦淨惟竄至開縣之藍白號

一毀有三四百人又會合另起一二百人賊數稍
多尤當加緊趕辦勒保應卽遵派妥幹大員帶兵
前往現在豐紳一路官兵卽日可以到夔又達勒
精阿武隆阿二員已自楚回川伊二人帶兵打仗
俱屬奮勇此時大寧防守事宜亦無須伊二人一
同在彼著勒保酌量情形或令豐紳移兵前往或
於達勒精阿武隆阿二人內酌派一員責令上緊

協同剿捕務先將此股賊匪剋期辦淨爲要至川
北一路現有陝省餘匪竄入不過二百餘人有田
朝貴在彼足敷堵剿陝省之賊甚少再奔赴川北
不過一二百名楚省現有二三千名賊匪恐有分
股入川之虞此時總以川東爲重川東各股剿匪
雖由各股竄匪剿急奔竄然川省邊界豈無防堵
之責何以任令闖入該省地方官豈能辭咎今既

已竄入勒保惟應督飭所派將領即在川境剿盡
不可以驅逐出境卽爲了事如果去川境剿捕完
畢辦理迅速功罪尙可相抵若剿洗未清卽逐令
回楚則無功而有罪矣又摺內所稱刊發簡明告
示諭令賊匪自投一節此時賊匪窮蹙之際其著
名首逆已殲除殆盡所存皆屬餘黨目前剿撫兼
施自更易於蒞事但仍當以剿爲正辦方可期淨

絕根株也再現在各處官兵均以次撤歸原伍著
勒保查明川省應撤兵內如有廣東官兵其道里
較遠應卽先行撤回俾得歸伍休息

勒保又奏言達勒精阿武隆阿等前此追剿蒲
逆時在竹谿大寧交界之黃風垭地方探有賊
蹤卽帶兵截擊有隨營糧員試用吏目江淑在
後催糧猝遇竄散賊匪戕害可否仰懇

聖慈照準亡例謫卹之處出自

大恩奏人

上從之

同日吳熊光奏言查竹谿境內蒲逆夥黨被兵
勇疊加剿殺四散逃匿又有黃藍白等號零匪
亦在深山密箐內遁藏臣恐大兵遠去餘孽又
出而類聚當加差探連日據報叅贊德楞泰將

蒲添寶剿斃就近逐加剿捕復分派兵勇於王安山大西河魚溪河白芨埡等處分投巡搜各路俱有擒獲又據總兵德昌稟報該鎮追剿黃白等號餘匪至散水河地方賊匪匿入老林該鎮派令都司羅倫麻光裕等分帶兵勇乘夜入林搜剿殲擒五十餘名敗逃之匪復經德楞泰派到官兵迎截生縛及殲斃者又有二十餘名

等語 查二竹境內餘匪據探差所報可期漸
次廓清卽有逸入川界者該省防兵自必及時
迎捕現在德楞泰從二竹一路移師赴歸巴一
帶督剿仍留德昌駐紮竹谿再將未淨零匪逐
一搜盡 臣亦飭該鎮務須逐處搜剿淨盡不可
稍有草率至歸巴等處零股賊匪據總兵吉林
泰李天林稟報陳姓熊姓兩股聞官兵追擊奔

遁入川其餘零匪避兵四竄蹤跡飄忽連日痛
有捕獲未得痛剿其由房縣東面山內竄出股
匪聞長齡孫清元帶兵從臺口進擊該匪分股
由珠藏洞蔣口等處竄及保康南漳邊界官兵
跟蹤前進該匪有折回西竄之勢臣伏查此時
賊股零散並無一定趨向官兵從一路追擊不
能四路絕其旁道是不得不激勸寨勇協捕爲

一時僅宜之計除嚴飭各路鎮將上緊探剿外
現就各屬已有寨堡陸續委員分投管帶以資
協力截擊所需經費仰蒙

聖明垂鑒楚省情形不同川省

恩准開銷但亦不可不加撙節臣督飭印委各員仿

照川省章程就其中必不可少者酌減支給務
使費歸實用斷不任稍有浮濫至各屬邊防鄉

勇現在川陝境內已無大股竄匪應卽逐漸裁撤以節糜費查巴東鄉勇前經奏明以次裁撤在案茲據率勇防堵之知府尹英圖稟報前項防勇業於六月二十九日及七月三十等日拔起撤出給以銀米交原帶之首領人等管帶回籍各勇仰願同籍歸農其爲安靜該勇等俱係該府所屬民人

臣

已飭該府卽赴施南新任以

資率屬彈壓又鄖西縣界連陝省山陽商州等
處向募鄉勇一千數百名分投防堵今陝省苟
文明業已肅除未盡餘匪無幾似無虞竄及楚
界所有該縣原募鄉勇亦可撤令歸農茲據該
管道員稟報前來臣已飭該道督飭該縣妥爲
裁撤安置查該縣鄉勇俱係本地民人大半有
業可歸安插尙易而該勇等因有

恩賞亦俱感激歡欣不虞失所滋事其餘善後案內
應辦事宜二十六日德楞泰師次房境之獅子

巖

臣

業經趕往會晤逐一面商德楞泰卽於二

十七日一早拔營前進經畧額勒登保奉

旨帶兵來楚約不日可到

臣

俟額勒登保來抵楚省

擬赴二竹一帶再與之從長籌計次第奏請

睿裁再提臣長齡前由竹谿帶兵東來

臣

往會晤見

其染患痢疾神色極弱時因賊匪竄及珠藏洞等處長齡恐其趨東北方疾帶兵前進茲據派往長齡處隨營各員稟報該提臣連日帶兵追賊以致痢疾加甚又兼吐血及痔漏舊病同時並發精神甚形委頓並接長齡來信稱因力難支撐若再勉強前進轉恐耽延剿捕將所帶官兵分派總兵孫清元副都統銜侍衛富翰副將

呢瑪善帶領分投剿賊長齡就近赴南漳暫爲
醫調臣查南漳距襄陽不遠一面札囑長齡安

心養攝一面飭令襄陽府爲之覓醫調治至所
追賊股爲數無多既經長齡將所帶官兵分派
孫清元等帶領並擊足資剿辦現在德楞泰已
移兵向東南一略督剿亦不患統率乏人均可
仰紓

聖厯奏入

上命軍機大臣傳諭吳熊光曰據奏官兵搜剿二竹
嶺有斬獲與德楞泰昨奏大致相符現在德楞泰
移師歸巴額勒登保已帶兵三千餘名由陝來楚
該省又添一路官兵一切糧餉最關緊要該督務
須督飭局員源源供運如有不敷不妨據實奏請
不可稍有缺悞以期速蕲大功爲要至善後事宜

吳熊光已與德楞泰會晤面商卽日額勒登保到楚更可與之詳細商酌有應行籌辦者次第奏明辦理再楚省現有兩路勝兵諒零匪可計日剿淨所有各省隨征官兵亦應以次撤回內廣東兵丁道途較遠卽先行撤出令該省將弁帶領回粵以便早爲休息又據奏提督長齡現在患病已將原帶之兵交孫清元管帶暫駐南漳調理刻下楚境

賊股無多帶兵將領不患乏人長齡可令其安心
調治不必勉強支撐其病體會否漸痊並著吳熊
光遇便附奏

初九日丁丑興奎奏言竊臣於八月十六日行抵

西安探聞額勒登保駐紮兩河口地方隨即趕

緊前往途次適接惠齡札稱南山內恐有逃竄

零星餘匪必須帶兵隨行臣隨酌帶本標遊擊

劉英魁帶領兵丁一百名於二十一日由子午
峪口進山冀可早見額勒登保詳悉軍營情形
起程日大雨如注迨進口後山徑本狹又加以
雨勢連綿山水漲發道路衝斷於二十五日始
行抵江口距兩河口尙有一百八十里現在水
深一丈有餘人馬一時難渡臣恐厯

聖懷先行繕摺具奏一俟水勢畧消卽便飛騎前往

奏入

上命軍機大臣傳諭興奎曰興奎因前赴額勒登保
軍營在江口阻水先行奏報抵陝日期昨據額勒
登保報到係八月二十四日拜摺業已奏明卽日
帶兵赴楚興奎途次想尙未聞知興奎現經額勒
登保派赴寧河一帶防堵伊接到知會自己迅速
前往寧河爲川陝甘三省接壤之區興奎到彼後

當督率將弁嚴密防守如有竄來之賊卽上緊截
剿毋得稍有疎懈爲要至陝省軍務經畧赴楚後
已有旨諭令由惠齡處奏報所有與奎在寧河一
路堵剿情形應遵旨隨時移知惠齡彙奏該將軍
無庸自行具奏

初十日

戊寅

勒保奏言

臣

體察賊匪近日情形萬

分窮蹙定必思一綫可生之路遵照節次

恩旨刊發簡明告示諭以悔罪投誠免其治罪飭令
各州縣分飭曉諭去後八月十五日有白號張
長青遣其夥黨王士鳳至雲陽所屬人和寨聲
稱張長青見有招撫告示情愿帶衆投出惟想
罪大惡極不能免罪先遣我來探信該寨首陳
世輔劉大翰等卽將王士鳳帶赴雲陽縣經署
令梁敦懷反覆開導諭令迅速投出可邀寬典

不必遲疑並繕給諭帖持去隨據張長青遣令
偽總兵張定坤陳求榮隨同王士鳳赴縣生投
署令梁敦懷卽帶領來營請示臣當向張定坤
等面加曉諭

聖主好生之德如天憫爾等誤陷邪教自罹極惡大
罪屢次降沛

恩綸雅爾等棄邪歸正張長青如果悔罪帶案投出

定當免其治罪將張定坤陳求榮王士鳳三人
名賞銀牌卽令梁敦懷帶同前往招撫其時張
長青帶領衆人在雲陽所屬無量山候信梁敦
懷帶同張定坤等前至無量山詎張長青因有
官兵搜捕之信又移向他處逃避張定坤等沿
山尋覓瞥見崖山有粉書直東二字知係張長
青所留暗號遂請梁敦懷在該境太平碕暫住

張定坤陳求榮王士鳳三人向東尋探行有六
十里地名龍硐見一百餘人屯紫山梁林內卽
隔山梁聲喊張長青聞聲出應彼此相見張定
坤告以投出真可免罪張長青見張定坤等三
人均賞有銀牌知招撫屬實疑懼始釋維時張
長青帶領尙有三四十人又其股內僞先鋒林
永義沈朝舉所帶六七十人均隨同投出又於

龍峒途次遇有黃號掌櫃李學坤帶有四五十人張長青勸令同投李學坤等俱欣然樂從遂一同至太平峒叩見署令梁敦懷俱痛哭投地自陳罪大惡極悔之已晚今日帶衆投誠但求饒命梁敦懷皆好言曉諭並令將所持賊旗矛桿等物登時焚毀隨將該犯等帶領來變

臣當

卽提訊據供張長青係雲陽縣人嘉慶二年閏

六月與林亮功一同起事連年在四川陝西湖
北等處與官兵打仗記不得次數了今年春間
被官兵打散因經過各寨洞看見告示投出可
以免死心裏疑惑不知真假適有王士鳳回來
說縣主給有諭帖招撫是真小的遂立意投出
當與先鋒林永義沈朝舉總兵張定坤陳求榮
鍾先倬楊遇明等大家商量衆人說我們犯了

這樣大罪原是不敢出去如今

皇上既有這樣恩典我們再不投出還等幾時當時
衆人意見相同這李學坤原是黃號的人也是
在山裏躲避官兵小的告訴他官府招撫是真
所以同來投的等語計此次投出白號僞元帥
張長青一名僞先鋒林永義沈朝舉二名僞總
兵張定坤陳求榮鍾先偉楊遇明四名探馬頭

向美富一名又張長青之弟張長生姪張士南
張士誨及戰手王士鳳等九十六名又黃號李
學坤探馬頭李祐賢排頭張大仕戰手李定安
等六十四名臣逐一提案訊問均各叩頭認罪
細察該犯等情詞實屬其心悔罪臣伏查連年
欽奉

恩旨剿撫兼施其隨時零星解散之人固多而似此

首逆家衆全數投誠者實屬從來所未有雖該犯等罪在不赦今既悔罪自新卽屬棄邪歸正若不全加宥免恐無以示

朝廷寬大之恩且現在尙有零星餘孽未淨設因該犯等投誠免罪皆聞風接踵而來更可不煩兵力迅速集事臣是以仰體

皇上如天之仁將該犯等一概全行寬釋並諭以爾

等所犯罪孽萬死不足蔽辜但既自知悔罪卽
屬良民今將爾等免罪釋回爾等皆應感激

皇上天恩安分守法該犯首伏地叩頭喜出望外

臣

將該犯查明原籍發交署夔州府方積督同雲
陽縣梁敦懷分別資送回籍取保安業原有田
產者查出給還本無田產者每名賞銀三兩作
資本營生

臣

又恐該犯等回家後或爲地隣親

族不容別滋事端復刊刻免罪執照鈐蓋印信
發給各人收執俾得從此安居樂業同爲太平
之民設有相繼投出者卽照此次章程辦理再
查前此達勒精阿武隆阿在大昌打仗時曾生
擒張長青之妻李氏等四口經德楞泰訊明因
其例應緣坐發交奉節縣監禁_臣提案質對皆
係被擄難婦各有親屬本夫在家並非該犯等

原配妻室此時張長青等既已投出該氏等自應免其緣坐係被擄之婦亦未便給令完聚

臣

現在發交方積查傳各婦親屬到案給領其在事出力之寨首陳世輔劉大翰二人各賞給軍功頂戴并賞銀五十兩以示獎勵再泰縣桂涌前在高陽將蒲逆餘黨一起辦完復移兵向前河進發二十日途次李家橋探得梁山萬縣新

定三交界之屬子山有零匪一起百餘人桂涵
當卽就近帶兵進剿該匪等一聞官兵信息卽
連夜竄走桂涵跟蹤緊追至金家營趕上賊匪
桂涵與遊擊程元龍都司周士貴分作兩路兜
擊殺斃賊匪二十餘名生擒男婦六十四名口
奪獲賊旗一桿長矛四十七桿查係青黃二號
剿散餘匪桂涵將活賊解送梁山縣臣現在專

典史考之卷之三
三
弁赴梁山提犯到營俟訊明再行辦理再署雲
陽縣知縣梁敦懷辦事勤能在川六載辦理防
堵糧運團練事宜一切認真從無貽悞前經

臣

奏

賞加知州銜又請以知州補用均蒙

恩允在案茲該署令復懇往無量山將賊首張長青
並黃白兩號餘黨一起全獲招出洵屬實心能

事之員可否仰懇

聖慈賞戴花翎以示獎勵再欽奉

諭旨達勒精阿一路殺斃賊目之兵丁李正順等酌

量保奏查達勒精阿武隆阿等已帶兵回川

臣遵

照就近查明兵丁李正順鄉勇游貴向來打仗

出力此次復將賊目楊有貴臨陣殲斃可否仰

懇

聖慈將李正順游貴二人

賞戴藍翎一處出自

天恩奏入

上命軍機大臣傳諭勒保曰張長青一犯本非著名
頭目積年稔惡首可比今率衆悔罪投出自可免
罪釋回但此等從逆兇徒均係罪在不赦之犯免
其一死得還故土屬破格施恩應飭令地方官

於該犯等回籍後留心管束固不可加以凌虐亦不可過爲優待長其桀驁總當設法令其分析散處不能復行糾合滋事方爲妥善倘伊等稍不安分仍蹈罪愆卽當加倍懲辦至所稱恐該犯等回家或爲地隣親族不容復刊刻免罪執照鈐蓋印信發給各人收執等語所辦尙未妥協該犯等兇悍性成本非善類得有官給免罪執照以爲此後

卽有犯法之處始終可邀寬宥則恃符肆橫爲害
鄉里事所不免免其正法已屬格外施恩何必曲
意保全致長刁風又令犯法是愛之卽害之矣除
此次投出各犯業已發給不復追回外嗣後如有
續行投出之犯祇當按名知照各該原籍准列齊
民不必官給執照註明免罪免死字樣以致別生
事端此次張長青等來投時遇見黃號餘匪李學

坤等勸令同投欣然樂從可見人情孰不貪生畏
死今見張長青等俱已赦宥回籍自必聞風偕至
冀免誅夷但勒保斷不可因張長青等率衆來歸
卽思以招撫了事轉相勸諭致將弁等心生懈弛
卽張長青投出之故皆緣官兵剿捕緊急無路逃
生是以投營乞命勒保惟應督飭各路專力搜捕
務於九月內將川境一律肅清毋得稍有稽延至

前次所奏大連邊界有楚省竄來零匪千餘人會
否業已殲淨抑或折回分竄究竟尙有若干人現
在屯聚何處本日摺內均未奏及著勒保卽行查
明覆奏再署雲陽縣知縣知州銜梁敦懷辦理防
堵糧運事宜認真出力此次復親往山內將張長
青等全夥招出實屬能事著加恩賞戴花翎又前
在達勒精阿一路殺斃賊目楊有貴之兵丁李正

順鄉勇游其俱著賞戴藍翎以示獎勵